

Augsburg, 15. März 1577

An Michael Mästlin

Druck: Michael Mästlin: Ephemerides novae ab anno salutiferae incarnationis 1577 ad annum 1590 supputatae ex Tabulis Prutenicis, Tübingen 1580, fol.):(3v.

REVERENDO VIRO, DO-
CTRINA ET PIETATE PRAESTANTI
M. Michaeli Maestlino, Mathematico insigni, nunc
Ecclesiae Backnanganae Diacono, amico
suo singulari, S.

Ephemeris tua, vir doctissime, nobis spem fecit aliarum quae secuturae essent. Hae verò Nundinae vana spe nos lactarunt. In causa esse remur, quòd interim cognouisti, Stadianam supputationem vsque ad 1600. annum, aequè ac Leouitianam ad 1606. esse perductam. Itaque vereri videris, ne ματαιοπονίᾳ tua reprehendatur. Sed si ijs credis, qui istis de rebus iudicare possunt, imò si tibi ipsi credis, non frustra laborabis, sed à studiosis hominibus, tenuioris praesertim fortunae, magnam inibis gratiam. Nam et pauci grande illud opus Stadianarum Ephemeridum, magno vendi solitum, habent: et qui Geneses non conficiunt, praeteritos annos nihil aestimant. Huc accedit, quòd tu, in singulos annos seorsum elaborans, accuratius et certius omnia perficies: et adiçere poteris prognostici illecebras, aut aliquid aliud, quod studiosos iuuet. Neque verò Typographus exempla non facilè distrahet, opinor, si aliquot centena excuderit. Quae cum ita sint: te non solùm hortor, sed etiam oro, vt lucubrationes tuas nobiscum communices, et fidem tuam apud inclytam Tubingensem Academiam liberes: praesertim cum plures Ephemerides te absoluisse testeris. Quas, modò edantur, omnes docti gratis animis accipient, tuumqüe studium laudabunt. Inter quos (si quis Vuolf<i>o locus est) ego non postremus ero, si primus esse non potero. Cum enim ipse morbis fractus et effoetus, nihil nauare possim atque efficere: ijs quos et ingenij et doctrina valere video, (inter quos te cumprimis numero) autor et hortator sum, vt Rempub[licam] literariam iuuare atque ornare non desistant. Vale, mi Maestline, αἰὲν ἀριστεύων. Et me amicitia tua, vt viri doctissimi et humanissimi, delectari magnopere scito. Augustae Vindelicorum, Idibus Martij 1577.

Hieronymus Vuolffius Tuus.